

In passet ni in passun

La sonda vargada ha l'Uniun da troccas da Glion envidau al secund maraton da troccas. 34 trochistas e trochists han dau troccas duront dudisch uras. La finfinala han Vitus Dermont e Sebastian Camathias gudignau il maraton.

Susi Rothmund/FMR

«Sch'ins vul gudignar drov'ei rutina, ins sto saver dar, enconuscher il partenari e capir quei che lez discuora, mo ins sto era haver las cartas», declara *Sep Cadruvi* dil comite d'organisaziun dil maraton da troccas ch'ei in'acziun dall'Uniun da troccas da Glion. El ei cuntents culla participaziun, ei pudessi denton era vertir aunc dapli teams. Uonn han ils organisaturs astgau beneventar 17 teams, pia treis dapli che agl'emprem maraton da troccas a Glion. Dallas 34 persunas eran strusch ina tiarza dunnas, las troccas paran pia aunc adina d'esser ina domena dils umens. Ei ha dau otg rundas da qualificaziun. Las otg meglieras equipas han contonschiu ils finals ed ils auters han dau vinavon pils ulteriurs rangs. Fertion ch'ils victurs han gudignau 300 francs han ils secunds survegniu 200 francs e pil tierz rang ha ei aunc dau 150 francs.

Troccas versus giugs digitalis

Enzacontas fatschas giuvnas vid las meisas da giug cumprovan ch'igl ei tuttavia buca mo in giug per persunas sils onns. *Sara Norina Bearth* da Rabius ed *Elena Candinas* da Surrein ein stadas las participontas las pli giuvnas dil maraton. Il plascher per las troccas han lur famiglias dau vinavon allas mattas ch'ei semesiradas per l'emprema ga ad in maraton da troccas cun carschi. Sco *Stefania Bearth*, la mumma da Sara Norina, ha declarau, dattan tut ses treis affons troccas e quei dètg bugen. Quei era sch'ella hagi all'entschatta bunamein sfurzau els da dar quei giug. Ei astgavien numnadamein haver il telefonin per dar giugs digitalis per sunter haver dau in scart troccas. Ella sala dil hotel Rätia era la tensiun e concentraziun d'observer en mintga cantun. Tuts han duvrau concentraziun e perseveranza per dar dudisch uras troccas. «Buca tuts han la concentraziun che tonscha per dudisch uras», manegia Sep Cadruvi. Sche quella lai sunter, cussegia el da beiber enzatgei dulsch, quei gidi. Per enzatgei che sa buca dar troccas eran ils «discuors» buca da capir ni laschavan mo sminar tgei che seigi manegiau. «Dir manzegas ei lubiu, ti sas dir tgei che ti vulas. La finfinala cugliunas o sesez, sche ti dias buca la verdad», declara Cadruvi. In passet munti per exempel d'haver fetg bunas cartas ed in passun seigien schliatas cartas. Ei detti denton era teams che drovien quels plaids gest il cuntrari.

Rangaziun

1. Vitus Dermont e Sebastian Camathias, 29/240; 2. David Tuor e Lothar Cajacob, 22/53; 3. Sep Cadruvi e Julian Cathomas, 21/14; 4. Peter Montalta e Norbert Carigiet, 22/136; 5. Renata Cathomas e Helena Diethelm, 23/124; 6. Flurina ed Annalisa Cathomas, 23/51; 7. Marcus Manetsch e Norbert Maissen, 22/34; 8. Flavio Huonder e Vendelin Giossi, 20/63; 9. Stefania Bearth e Linus Beer, 20/-81; 10. Lucas Camathias e Marcus Tschuur, 19/-66.